

無棣縣志卷十三

人物志 四

孝義

唐

徐文亮天性孝友與兄弟數世同居人無間言貞觀中旌表其門以粟帛存問復其役

明

王朴字子素嘗從游張仲舉之門經史通貫而尤邃於易洪武壬午膺明經薦典教濱州未幾懇歸養性至孝父暑月遭疾熱極思冰遣人遠致之比至已告絕矣遂痛恨終身不飲冰以子佐累贈戶部尙書

郭進字明先有義行弘治二年捐銀二百兩使弟雲立市場二一  
無棣縣志 卷十三 人物 孝義 一  
山東商務印刷所印

爲鍾鎮店一爲東辛集招商旅通貿易居民便焉  
張兆瑞諸生讀書寺中夜聞婦哭甚哀詢知爲王姓夫貿易江湖間聞舟沒於水家貧遂自縊會鄰婦乞火得免兆瑞念人言未足信因作僞書裹五金送之云自荆襄來有少年寄此或不誤也王旋獲利還婦言及莫知疇之所致赴省試旅邸有遺金納橐中數日其人來覓付之去恐假他手致差池也旣行復阻雨誤試期除夕聞呼盜聲曰非盜也貧民耳或無以奉親故作此不廉之舉命寢其事自是每於除夕前施糕粥無停歲年八十無病而卒

丁福正統三年鄉薦事繼母柴以孝稱柴待諸子最嚴多逸去福夫婦事之惟謹遇母怒責怡然順受無幾微見之顏色或夫婦跪牀下夜分不起出訓河間持己訓人卓有聲譽尋伴讀晉藩徒紀善王所賜珍味不獻母不敢嘗母卒臥地感寒疾遂不起貧無以

殮王與藩僚贈賙乃得歸祀鄉賢忠義孝弟祠崑山許侯爲之記  
子珣登進士官副憲

吳志德字明揚諸生修髯美丰姿與人言和氣藹然惟恐傷人意  
天性醇篤事親友諸同產爲宗族鄉黨所稱有三大姓爭田從中  
排解兩姓或面辱怡然受之終調劑使歸於好貸貧賈以金其人  
物故不能償召其子折券示之無德色其賙卹類如此卒鄉諡榮  
壽

王所師字範宸補諸生不屑屑事帖畢篤實行宗黨以孝友稱崇  
禎末土寇竊發令屬師飭戎備條理井然性樂施予周貧乏邑中  
大建置如新學宮創文昌閣設關帝城隍等廟香火地皆捐貲爲  
衆先年五十六卒子清仕至少宰贈如其官

王化豹務農業性篤厚人多欺之悉忍讓不與校子璉貢生

無棣縣志

卷十三

人物 孝義

一一

山東商務印刷所印

清

劉汝魯字臬石明副憲三顧子武庠生父及長兄俱殉明難念先  
人藁葬不成禮卜地改窆並遷二兄以從長嫂楊汝魯敬事之既  
沒竭力經紀其喪以孫爲其子嗣又念仲兄早世命第三子爲奉  
烝嘗雖家業蕭然而重倫敦本類如此子續武進士

張體仁號小溪急公尚義閭里欽服撫育諸弟姪尤恩勤五世同  
爨不分門內老嫗稚子穰穰熙熙百犬共牢而食授田官巡行畝  
畝敦勸農事撫憲賜匾額曰周廷保介

張欲仁字來復諸生性脫灑胸無沾滯孝友慈愛對人諱短譽長  
不飲酒有酒趣曠達好客良朋晤歌終屑不倦事不如意善排遣  
興致倍平時子姪輩有過婉顏勸諭不怒責在庠四十年貌偉長  
鬚年七十卒

張珍字席秀體仁子處人直率遇事有擔當時鼎革未幾土寇蜂起與從弟琛訓練鄉勇捍禦有方寇至抵敵者數次鄉人恃爲保障舉義官邑宰賜匾額曰功高禦侮

牛炳璿字玉衡父聯斗官粵東以觸瘴死訃至炳璿年甫十六號泣匍匐數千里扶櫬歸邑令表其閭尋補諸生卒年九十六

郭鳳興字來儀豪俠喜交遊修學宮成碑石轉運維艱獨力捐任所費不貲憐馬氏子流亡無依收養之及長授以田產人義之以其字名村

王瑁字海毓諸生少孤而饒於財人懷覬覦或以勢相凌逼瑁怡然處之愠怒不形於色居恒靜坐一室焚香煮茗取古聖賢嘉言懿行及成敗治亂之蹟可以垂訓後人者彙爲一書曰度年隨抄庇宗族值歲祲逃亡丁賦身任完納邑有大修造率出重貲爲先無棟縣志

卷十三

人物 孝義

三

山東商務印刷所印

導推食解衣濟乏困凌逼之者自行愧悔云

王小衢以字行世業農樂善如飢勤且好施居址數武爲梁王莊橋溯流而上爲大山橋又鬲津河上張仲橋皆歲久廢圯陸沈爲患小衢首倡勸義土木磚石之費逾數千金沿門募捐輸貲助材者相枕藉四越歲而三橋工竣時年七旬里人爲慶成功因爲壽貢生張克家製壽序詳其事子扶明庠生

李蕃生字錦如庠生父之新偕山陽令牛聯斗之粵東任病卒蕃生聞痛不欲生隻身奔粵扶柩歸中途遇風覆舟蕃生抱柩隨渡上下越三晝夜飄至烏江項王廟前肱脇之骨皆露僅存微息猶抱柩不置觀者如市羣呼奇孝山東巡撫劉允謙給匾旌之祀忠義孝弟祠

李應昌字逢泰生春子廩生自幼失怙母嫻內則教之讀書遂向

學不少息奉母甘旨不缺教兩弟全昌道昌皆顯貴值歲祲外鄉一少婦抱子乞食土豪將辱之婦跪求救應昌釀金令約地送出境遂得脫

丁公坤字席珍明副使珣之裔世德相承孝友和順家貧以間舍爲旅寓有客遺金而去後五年客至語及坤出其金封識宛然客將分其半與之笑而辭曰我若利此則不存之至今矣壽八十八歲長子成廩生

李爾蘭字雲佩增生道昌姪幼孤育於道昌夫婦蘭事之如父母道昌舉子晚家事悉委於爾蘭秉家政十年叔歿撫諸弟旣壯乃歸其貲產而自取薄田數頃僅足供饘粥侍叔母膝下終身無毫髮憾諸弟旣老猶嚴憚之撰思友編一冊

王勉字介如瑁子增生急公益新大成聖像建魁樓立義塾給旅客墓田修棗園橋長堤葺大覺寺寶塔敦宗睦族施藥濟人壽八十餘以子秉義贈文林郎

郭奇勳字西川性慷慨比鄰馮姓貧困幾難自存奇勳憐之與以田產俾謀生業臨終復與錢二百緡不數傳馮與郭氏並興於張思敏店起宅見關帝廟陋甚捐貲創建規模閎敞足壯觀瞻

李爾蒞字雲馥庠生援例候補州佐言規行矩不逾尺度治家肅嚴弟姪輩偶有微愆訶斥立及皆敬憚焉寡交游門內無雜客邑令韓量移且去語人曰吾蒞茲土久薦紳先生無不欵洽惟署前雲馥李君名可聞人不可得而見蓋篤實方正君子也其爲時所景慕如此

韓模字範子性嚴方持正議不唯諾族黨紛難模以一言立決康熙年歲大饑有族弟業方少其兄賣於他縣爲奴役模聞之急遣

人贖回謂其兄曰爾多此一弟吾正少一弟遂收養之及長授室予之產鄉人稱賢德子廷佐登賢書

李維森字夢序爾蘭子庠生事父母曲盡色養母卒哀毀成疾敬兄愛弟終身無間言父寢疾衣不解帶者數閱月父禁止之帷燈匿影有呼輒應無少怠父卒既葬廬墓二年朝夕哭奠聞者心惻邑令旌表其門鄉諡孝恭祀忠義孝弟祠

永嘉令張東峯嘗問廬居時三年中盛暑嚴冬淒風苦雨景况徐答曰但覺日月迅速耳東峯嘆曰真孝子語

李維樾字仙蔭為人孝友質直矩矱準先民鄉人有闕于牆者既而悔曰是不可令李公聞也其感人之速如此卒邑紳士旌之曰孝稱在宗族鄉黨之間瀟灑寄詩書簪纓之外蓋實錄云

吳旭字寅賓自肅子體弱而性篤遭母喪大慟仆地日夜泣淚滴漬苦塊坐臥皆濕年十九卒

無棣縣志

卷十三

人物 孝義

五

山東商務印刷所印

吳象義字則之自肅子甫七歲生母歿葱薤不屬口康熙辛巳父以臨汾參革令某仇扳入晉對質幾不測象義破產畢市隻身走晉陽山中遇雹顛躓幾殆往復燕晉千餘里若南北舍及事解父歸謂諸子曰微爾兄爾無父矣命羅拜之年二十七卒有雜詩一卷家諡孝悼

王滋曰則之竭股肱之力奔走禦侮奉其老親以歸家之孝子無異國之忠臣乃年未三十竟以勞瘁歿悲已

馮伊蔚字蓼懷幼失恃育於外家性謹厚不為童子嬉見他家子有孺慕膝下者輒感然曰皆有母依翳我獨無稍長受書一再讀能成誦弱冠補諸生食餼父憲以遊學歿於京值淫雨經旬近郊多罹水患流離載道伊蔚聞訃即日徒步奔喪扶櫬而歸教授生徒以明經老

楊延簡字敬輿明太宰魏裔孫庠生事親願志承顏友于兄弟遭

父喪一慟幾絕三年食淡茹茶不櫛不沐雖酷暑嚴寒未嘗離苦塊越數年母卒守禮如前喪及葬反哭後卽結茅墓次寢處其中每日必泣以祭久乃退服闋家人泣請始拜墓號泣而還乾隆十二年奉旨旌表祀忠義孝弟祠

查懋家素封尙德好義乾隆年歲大祲捐銀萬兩賑武定屬諸縣饑民全活不可勝計弈世科第聯綿人以爲善德之報

李維楚字子翹爾蒞子庠生生而醇謹自少至壯依父之左右呼之卽至推食解衣宗黨中多有待以舉火者汪邑令以內艱去職柩停寺中際除夕念其旅魂無依爲設羹饌於柩前令補於陵其僕抵任所言之令卽呼曰取新衣冠來向東北稽首流涕曰李君之德沒齒不忘其施恩不計報多如此

李維棣字鄂發事母稱孝篤於兄弟雖析箸遇有緩急所需多寡無棣縣志 卷十三 人物 孝義 六 山東商務印刷所印 取之如寄至鬻產無吝惜

劉深幼失母一姊早適人深隨父傭賃以食年十二父困飢寒將他徙深牽裾不忍捨父竟去深歸爲人牧羊豕後數年父遷移歿於金州有知者以告深日夜啼泣爲廢其業姊聞父死來視深深曰父骸骨棄於外吾將往求之姊質錢七百以爲資深遽別姊丐食出山海關又千里至金州日夜呼父名而號於市卒得其父瘞處負遺骸以歸時深年方十七也

李維李字仙禽庠生性豪爽喜交遊廣延賓客廳事之內茶沸之聲不絕有事涉疑難者皆來相質李悉心爲人謀畫有俠義之風李傳庠生好施予濟貧乏倡修橋梁施捨方藥每歲冬設粥局製棉衣以救飢寒道逢無依者卽解衣衣之家素裕以是而貧終身行之無悔邑令旌其門曰善人卒鄉里弔者幾千人有羣乞數百

會葬號泣不絕聲

郭祚昌字永錫幼年失怙事母稱孝家貧訓蒙博館穀藉奉親兼自刻勵中年入邑庠

李炳字星漢太學生以經商致富聚而能散沾溉族鄰於閭閻中義舉亦甚多子世偉太學生慨爽有父風

李駕字方軌太學生家貧好義舊有山子莊草場十餘頃四方採薪者久族人與衆爭勸駕借以生財駕曰此皆鄉里之貧者因而圖利可乎遂書木於場側設於義田衆悅欲旌其門力辭乃止至今百餘年族黨困乏任其取薪焉

王重戴字又昌清孫增監生性篤厚善必稱親家饒於財而族多貧乏父沒既窳集奏族曰先人有遺命不敢忘出函金如干以親疏緩急差分之歲饑奉母命周給親黨出積粟數百斛減直平市無棣縣志

卷十三

人物 孝義

七

山東商務印刷所印

價舍南置社學乾隆中邑宰興立書院謀諸戡戡曰此先君子志也捐貲修建里中無力喪葬婚嫁者量給所需衆皆德之年未艾而卒

楊松年明太宰巍裔孫字茂齋同胞五人松年甚幼且貧然獨得堂上歡饗殮不給而事母甘旨無缺非一日奉母不樂母亦非一日依之不歡也嘗出遊失意返恐母見之不快乃以紙裹塊礪置囊中慰爲有金曲體親心類如此外祖母瑩獨無依迎養以終歿後按節奉祭臨終猶遺囑子孫俾香火勿絕云

楊升階字貞菴庠生守分安貧生平不解干謁言規行矩率可爲子孫法元配高氏未嫁時失明母家來言肯婚與否惟命父母因商之升階對曰兒若瞽女其能他適乎遂娶之人稱其盛德二子鍾嶽鍾嶠俱庠生

張可敬字天池崇德好義邑侯楊燧給一鄉善士匾額

張益聞字友之庠生篤孝友輕財重義親朋告急無不應里黨義舉必首爲倡率有吏人某鬻其宅已給貲立券矣其母忽携子來請蓋艱於遷居而貲已耗竭即返其券不責償自奉甚約食惟蔬菜曰古人云菜根香夫豈欺我

王用宏字普存庠生幼失怙兄弟怡怡無間質直好義德孚閭里卒鄉諡端毅以子琦贈修職佐郎

張淇字右武性篤質長身而骨梗與人交則情意殷拳不設城府故人咸愛重之事親孝雖遠遊能使親心慰於弟友曾推讓應分財產於同祖弟無德色精篆隸書法近率更又工繪事筆意近八大山人亦類雪鴻甫弱冠卽奔走南北爲負米計比中年始効力史館得議叙分發晉中攝歸化城巡檢官非親民民之愬訟者爭

無棣縣志

卷十三

人物 孝義

八

山東商務印刷所印

赴焉

張佐清字靖侯童年就傅磊落異凡品見古人請纓投筆故事輒眉色飛舞嘆曰男兒不當如是耶乃習武事以冠軍入庠五赴秋闈數奇鍛羽談者爲之扼腕父早卒幼依嫡兄立以未逮奉嚴親引爲終身恨事慈闈致孝敬念兄撫育之恩推讓美田宅家人或缺望則引薛包分產事譬曉之近郭門設武塾族姪琴堂多膂力召入學家貧給以弓馬刀石並進取所資試輒冠其曹成進士講武家悉圭臬奉之生平喜結納重然諾濟困扶危推解立應鄰某以嫌隙停婚爲之好合數世朱陳之誼彌篤邑有大工作捐巨貲爲衆倡年七十一預刻時日具衣冠臥榻上瞑目而卒子萼林武舉

劉貞吉字康侯武庠生秉性正直爲人排難解紛和爭訟造門而



求者踵相接也自言吾不知書勉強做好事而已鬲津河水橫溢買舟以渡行人乾隆年歲荒旱饑民會聚借糧於大戶實計劫奪歲稔大戶訟於官羣懼乞求緩頰割田數十畝為饑民償事乃寢郭鉢字世傳監生有至性不負然諾乾隆中捐備荒穀一百石永利場大使匾其門曰義直可風

楊家琛字蘊輝廩貢生章邱縣訓導家居篤孝友御子孫有法度自塾歸必詰問所學其疑難處細為講解值歲大饑糧價騰貴乃出所積儲減價平糶次年春又放粥以賑濟之人受實德焉

張承恩字沛深映漢子附貢生性篤孝侍父母於官署父有不懌輒舉一可喜事及所樂聞語從容陳說或偶有欲購之書與應用諸器方含意未伸移時視之則已備如逢故物焉母夫人雖貴而操作如常恒不令人代乃潛使婦代之而故作嬰兒嬉以博母笑

### 無棣縣志

#### 卷十三

人物 孝義

九

山東商務印書館印

弟仲孺娶數年不育承恩婦生子三日潛送弟室出告父母曰弟婦生子矣兩尊人為之欣然其先意承志類如此

張淑旺父外出不知所往母卒後淑旺年十六徧尋京師不得痛哭而返有姊弟二人數年畢婚嫁絜家至京師圖訪親乃書零丁標於背歷古北口熱河土城子等處險阻病困瀕死再三三年卒得父遺骸於昌黎黃嶺慟哭召弟淑啓至製棺歸葬追服三年一時名公作詩文以美之有三年淚灑西風徧千里魂歸古木森之句

侍讀朱筠紀張孝子事略近世稱孝者多在奇節宋以割股明以廬墓創始者發於至情之莫遏而繼者相屬惟尋親得情之至正者卒鮮黃其難也國朝以尋親著者先後得五人犯鋒鏑以奉親歸者為黃向堅奪父骨於苗保者為劉龍光尋之而終不遇者陸寅尋之而得其樞者彭孫貽得墓者翁運標有淑旺而遂為六向堅諸人皆累世詩書之澤淑旺顧操奇計贏賈人子耳非有嘉言懿行以漸漬其心而激發其志卒能孤行其意歷九死而不悔以遂其父首邱之思而無愧於向堅諸人所為夫拘儒牽於成議買

人以無所障蔽而克為之其天全也賈人所為也至於拘儒所守則夫儒衣儒冠嗜利而忘本者皆賈人所不為也至性不恆見於人

儒而孝有黃向堅諸人賈而孝則有張淑旺人盡人子子盡當孝可以興矣

見檔册文  
殘闕俟考

李特遴字林二道昌五世孫恩貢生贈文林郎天性孝友父患痢泄數月衣不解帶父歿哀毀骨立慟不欲生見者為之感泣兄患風痺親侍醫藥無倦容子于絳于沆皆領鄉薦

楊培深字茂遠大學生為人慷慨豪爽表裏洞徹戚友有疑難事出一言以解之罔不敬服弟源早世撫諸孤如己出御子孫嚴禮法為里黨最壽至耄耄而卒

張懋官字逢哲庠生珩子早歲為父持門戶父歿柴毀骨立事母益恭謹惜名節重交遊遇畸人名宿折節結納杯酒流連肝膽傾吐訓子弟以學古通經立身行己大義夜深篝燈一室呀唔參論

無棣縣志

卷十三

人物 孝義

十

山東商務印刷所印

書史折疑義年八十有七以卒

張映蛟論交叙逢哲有藻鑑辨賢否而於物亦無忤雖行誼素梗於心者與之接皆飲以和至賓朋讌集則娓娓洽暢閒出諧語使聞者解頤善治生田不贏百畝能盡地力節己濟物初不以出納形局促宅後隙地雜植花木四時佳日雅可賞心洒然高致晚節初如

王孟慈字蔭谿清玄孫庠生八歲失怙事母以孝聞友愛兄弟待人無城府生平純厚靜穆物我渾然五世一堂卒年九十六

張燧字健亭庠生性尚清高重品行有昆弟九人事親以孝名事兄以友名嘗謂子姪輩曰讀書明理非只為功名計也處世學喫虧喫一分虧即增一分福又曰家貧不足為善勸人作一善事如已作一善事同快意聞者歎服

劉曰誠字中孚精醫術臨症多應手奏效遇貧窮無力醫治者輒施藥以救之一日路遇昇婦攬過者鮮血點滴審視之並非死血

令昇歸開棺細視似有微息投藥一劑須臾婦蘇胎下此因產難未死而誤殮之也後曰誠歿婦披麻來奠以再生父哭之子萬青亦善醫能繼父志

劉雲峯字嵐亭嘉慶戊午科武舉曰誠弟也善製膏丹靈藥鄰村有婦常負子至市買餅餌食之詢之婦曰夫家姓韓家貧夫死遺此子甫週歲腋下生瘡足不行現已五歲動輒背負甚累人也審視之曰尙可治乃敷以丹藥予刀圭劑使煎服之數月能行道光二年歲饑人不得飽明年歲豐人多腹脹肢腫之疾死無數乃曰此脾虛胃溼症也立方施藥活人頗多與兄曰誠參考古書著醫學管見錄

張自標字樹堂例監家富於貲食指繁設長席傭工數十人課耕織內外井井皆有秩序性豪爽喜施鄰舍待以舉火者衆有義舉無棣縣志卷十三人物孝義十一山東商務印刷所印

輒身任之

不怠

道光初歲

祲捐粟

出貲救活饑民子魁林登武科

孫安字磐石歲饑出粟三十石周族黨不取償

王毅之字果亭孟慈子幼不好弄凝重異常兒長而和粹內行篤修祖母年逾八旬父母亦皆老邁家屢空多方籌給旨甘不缺一子惟誼未中年亡或憐而寬之毅之曰吾老親強健方承歡不暇不以是爲戚戚也補郡學弟子員以優等食餼

馮成業字建亭太學生性和厚喜施忍受橫逆又憐其窮極而賙卹之嘗別畜牛力以資貧者耕作道光元年春乏食糴糧二百石濟鄉鄰敦善行至老不怠鄉人公送厚德遐齡匾額壽八旬

張萼桐字梧菴佐清子以孝義著與弟萼峯萼林並遊武庠聯翩綵舞膝下承歡退則習擊刺射飛以爲樂弟萼林掇武科官常州萼桐以父年老佐理家政訓子姪皆有法度以事適濰縣早發旅

邸路旁有襤被一具纍纍多金急携至寓揭白通衢有客貿然來述其遺失之由驗金數悉符即還之客欲分其半却不受曰吾有利心早持之去寧得半已耶詢其人係江寧富賈後往來若通家劉湘字雁浦未弱冠入郡庠因卜葬延地師空言難信遂習堪輿學十餘年精其業爲人擇地決休咎多奇中祈者無不應或貧無力則自以車馬往謝之弗受強之則艱然怒曰凡民有喪匍匐救之義固當然耳又喜方書察脈理受鍼法於膠東于浦澤先生凡所診治應手奏效然不輕予方或予方卽裹藥予之病者以藥物償亦不却也其爲人醫又如此友者贈之詩曰閒身忙歲月冷眼熱心腸逼肖其人子北壬亦庠生

孟繼莆字庖瑞九品職銜少孤祖母撫育之及長事祖母以孝稱樂捨施慎交遊德孚閭里公送積厚流光匾額

無棣縣志

卷十三

人物 孝義

十二

山東商務印刷所印

賈紹清貧人也賦性愚魯事親孝傭工得直必市甘旨以進父母憐其得錢不易屢止之不少輟或與人有爭雖理直父至輒屏氣拱立不發一言父母歿營葬畢每日必至墓週視哭不已年餘卒張治聞字習之映緯子弱冠入庠旋食餼父歿奉事祖母及母友教南北博館穀致孝養家人薇藿弗充有訪之者見案上備具滑甘戲嬉於前博老人歡滿堂笑語怡怡忘憂應京兆試三藝皆慘淡經營冀得一當卒見擯讀其文者爲之扼腕以鄉貢終

王鳳彩字桐軒庠生家貧父歿於瓊州相去八千里計聞匍匐南行沿途托鉢半載抵粵境瓊處海中力薄不能買巨舟渺渺一葉出入於洪濤巨浪中顛簸上下屢瀕於危水陸遞更逾二年始扶柩抵里鄉人感觸共醵金營喪葬

余希孟字宗輿繼母王氏歸未一載而父卒繼母之家欲奪其志

希孟方七歲伏母懷大慟母亦慟遂矢志靡他及長勗學有文譽訓蒙得館穀奉事饑餽不缺母子稱賢孝

劉懷東字宗魯父出關外不歸懷東走瀋陽及遼海長白山左右巖谷寺觀徧尋覓卒不可得痛哭而返事母益恭謹精岐黃全活甚衆餽遺一無所受子執中庠生

邢德元事繼母孝母老失明躬親服役十餘年無惰容

張萼林字榮軒道光乙未武舉官常州衛協運千總在任懲猾役杜宿弊以父憂固請終制逆匪犯順河北騷然佐江邑侯練鄉團興築城外圍牆悉心規畫邑人安堵在籍十餘年與人接肝膽相示緩急時須不待呼籲後赴德州糧道署需差委以疾卒

王翼字貞觀幼而穎異既冠補博士弟子員家貧事親以孝聞親歿三年廬墓側膺道光丁酉鄉薦甲辰恩賜國子監學錄

無棣縣志

卷十三

人物 孝義

十三

山東商務印刷所印

王世恩字澤普恩貢生孝義誠篤家無儋石儲日手一卷晏如也糾合同志置書千卷皮貯一室俾衆公覽觀察張映蛟解組歸游息桃塢竟夕談讌最稱友善云卒年九十三

張映蛟贈叙云余居桃園訪澤普而識之傾蓋如舊好澤普幼敦孝友長達物情守退讓慎踐履性恬淡不問生計年屆八旬耳目聰明齒牢善飯雖處約其家人子婦皆藹秩循禮則亦可規澤普型化矣

孫讓字遜齋以商富性慷慨仁慈買一婢其父母思之切遣歸不索值鄉人以積善餘慶匾其門

馬孟寰人也父秉儉營生遼東十年信梗噩耗時間孟屢欲尋父母止之曰汝父存亡未可知汝齒稚汝去吾且奚依也年十八泣請於母乃出荷鋤傭工以糊其口逾山海關輾轉至吉林行荒山中穿榛莽犯虎狼瀕死者數矣卒於長白山附近得父所在抱足啼哭奉之歸計出時已三年矣遐邇傳播聞之者感觸泣下

張於莪字儀如監生體幹修偉性和易事親能盡孝養人無間言弟歿於粵數千里歸其柩居恒循禮不踰尺寸逢朔望家祭必具衣冠雖年高不使子孫代

張於荷字孟澤諸生父歿於楚匍匐扶柩歸母歿貧無以葬遊於粵數年積館金百餘歸營喪事季弟歿於豫赤手往二年餘卒以館金歸其櫬

李仕管字笙甫業儒家貧設帳於外有姪數人積館穀所得悉爲納婦而已竟終身不娶晚納妾生子女

李本緒字業園太學生氣體俊偉與人敦厚古處而達物情通事變譬曉得失是非糾紛立解尤喜獎掖後進諄諄勗之嚮學無力者資以膏火費周卹族鄰終身不少懈年逾七旬微疾卒

韓連發字振東奉嗣父以孝謹稱有從姪父亡母醮撫養以立嗣無棣縣志 卷十三 人物 孝義 十四 山東商務印刷所印

急卹鄰無吝惜鄉譽藉甚有忤之者或加橫逆弗與校既有求仍予之其人終亦改悔云

張兆渭字晉陽質直好義施予無吝惜歲饑出粟救急無業子弟畀以金使學賈不能償則折其券有不知姓名貸百金以去者或以爲愚笑領之而已卒之日鄉人感其德皆垂涕

韓立乾字健行封修職佐郎少有文譽父歿後棄儒爲農家學自奉甚約而與人則惠鄉里告糴不較直斗量加豐焉曰是貧乏所待命也或併錢反之其長厚類如此教子勤讀書勗以強爲善學喫虧嘗曰吾夙昔以犯而不校一語做工夫雖不校於外或校於心今六十矣猶兢兢未能自克云子中焱舉人玉森恩貢生

郭有勇字知方家不中貲而好施戚鄰無力婚嫁者無不量力助有孀婦守節翁姑欲嫁之婦慟不欲生有勇斥其翁姑養婦於

家數年以成其志又有出妻者有勇招其婦至家命妻常氏教以容工卒歸好和其家數世感德焉

楊師言字蔚東諸生綱子嗣伯父後嗣母性嚴厲能盡孝養無違志與人交不設城府嗜飲善醉灑然天真坐客期會戶外屢恒滿邢元醇號亦齋早歲入庠母病連年不起轉側食息曲體備至後事繼母尤以孝稱道光壬午領鄉薦設帳教授承學者衆廉吉惠吉謙兄弟宦裔也來拜門下成進士奉三百金爲壽俱以修建義學布衣疏食終其身

張紹遠字德言太學生篤行孝友家庭雍睦爨乏異煙樵無常服繼母鍾愛一女外孫失慈靡依收養之及笄相攸貲妝豐備鄰有宿負鬻宅以抵却弗受曰我無此不致匱若無宅何以爲家並燬其券其人感泣

無棣縣志 卷十三

人物 孝義

十五

山東商務印刷所印

王惟廉字澹泉清七世孫孝友內植學殖不遇以田產給諸姪遨遊楚吳間大僚延致幕中與謀機要動中窾會暇時縱觀名勝山水以自怡肖像爲灌園圖神情瀟灑逸塵絕俗歸橐直數百金以給兄弟親戚貧弱者日與故舊聞人談讌爲歡能詠詩不欲人知寥寥數章皆至性語年七十卒於家

張寅清字敬齋兆渭子太學生事母色養無違家貲落有田在馬谷山下依以居去十餘里往復以晨夕甘旨之奉無缺嘗暮夜大風雪負饌具趨里門更深戶未扃入則母坐榻上室漆黑問奚不寐曰知汝必來故俟之也母年高病咳嗽乃登榻倚身後以肩承母頸以息母稍舒熟睡去雖隆冬寒弗恤也母以大年終哀哀爲孺子涕卒同鄉以孝德表其墓子方圻增生方墀舉人步掄典字有常幼爲伯父嗣旋失恃賴大母撫養之稚齒婉顏卽

能爲膝下歡長僦居京師地名江亭者治田其間身親芟柞手運  
桔槔露宿風餐以爲常敦本桑梓閱歲輒旋里省覲遇喪葬大事  
不遠千里徒步往復嘗暮行天津南踏冰踣踣狂飈忽起塵沙眯  
目遙望荒村燈光竭蹶投止已至四鼓其不避艱阻如此抵里序  
祭祖墓族衆率從禮成合食情話婉變留數日乃返子翼鵬順天  
癸卯舉人

王紳字縉廷家素封慷慨好施咸豐初歲大侵捐粟二百石賑饑  
乏蒙獎五品職銜卒年八十三

黃宗魯字秀東弱冠喪母哀毀異常事繼母益恭謹友愛兩弟若  
不知爲異母者父卒後延名師教之讀撫循督責恩義並至宗澤  
入邑庠有文名宗度以醫術稱兩弟事兄終身敬禮不衰

孫昌緒字詒堂增廣生以齒德尊鄉閭性開霽遇事持大體是非  
無棟縣志

卷十三

人物 孝義

十六

山東商務印刷所印

不可撓抑有鬪者爲譬曉其曲直紓解之或不服以質於公庭曲  
直如其所言故人益敬信訟者衰息子靖遠舉孝廉方正

吳壽齡字祝三太學生精陶朱術富而好禮求者輒應不計其償  
否堂弟寬齡貿易有年欠者不能償壽齡勸弟焚券而如數付以  
貲因貧者艱於讀書倡率族人立義塾一又獨捐貲立義塾一邑  
人公議杜弊規則擬立石垂後而歛無所出壽齡獨捐貲成其事  
性不喜人爭遇有爭者必力爲排解使歸於和甚有須賄而和者  
又必貸以賄而使之和當其時鄰里少爭訟鄉人以尙德好義勒  
石表之通衢當之無愧色云子汝珍慨爽有父風

孫仕堂篤念天顯以兄食指繁讓所應分用產之半居里閭排解  
紛難人服其明允爭訟以息

徐鈞家不豐而好施咸豐間張店橋于家橋同時重修鈞捐貲殆



盡工始竣事

傅鈞字關石家富於貲鄉里困乏者歲終給以米麥財賄以爲常姊適張姓故不豐割田百畝舍一區養贍終身鄉里有善人之目邢洪照字化普強學博聞篤善行不怠尤善息人之爭有涉訟者洪照至則立解邑宰獎以持公服衆匾額

高信文性純孝幼失恃事父承顏頤志傭工奉甘旨父歿廬墓三年服除每祭必泣下

張森字茂林其先世爲邑典史遂家於棣咸豐間歲饑捐貲賑卹人食其惠

范玉林事繼母孝母積病臥牀褥和藥調飲雪垢搗葳不以人代數年如一日

張於蘅字湘浦家綦貧弱冠與胞兄於芳先後遊秦兄被掠於賊

無棣縣志

卷十三

人物 孝義

十七

山東商務印刷所印

於蘅毅然入賊中探兄耗知無害顧不能通問乘機逸出未幾兄亦出泊兄館西鄉復遇賊死於難於蘅時亦爲賊掠去輾轉至河南始得蹈隙逸復赤手回秦求兄骨訪得之負以歸後官陝西石泉典史改河南內鄉縣卒於任身後蕭條不得歸邑人感其義醮金置田贍其後

張守廉字子清衍福子陝西巡檢奉差漢中父任甘肅華亭縣聞失守亟奔往到後知己殉難母攜幼弟走漢中中途相左父柩先已藏土窰中哭拜已封護之仍返漢奉母入川乞親友得斧資旋歸里又隻身返甘肅冰雪踽踽沿途托鉢備嘗艱苦卒奉父柩還哀痛積勞病已不支抵家門未逾月而卒人謂父爲忠臣子爲孝子洵無愧色云

張輔清字佐賢增貢生性孝友有肝膽樂善好施見義必勇爲之

同治中捻匪亂畜有良馬縱之去賊見馬爭取遂率鄉人遁未傷一人光緒初旱饑捐穀二十餘石救貧餓四年春雨出籽種五十餘石與鄉人有還者却弗受曰吾若居奇積金多矣邑宰周衍恩獎以尙義家匾額莊前有橋數世獨力捐修行人稱便因名爲尙義橋自奉儉約持家整肅年八十二微疾卒子元勛庠生高汝常事繼母以孝稱家貧爲弟納聘完婚而已竟終身不娶劉祥紱庠生捻匪之亂避地海濱母病痰嗽晝夜擁護衣不解帶者逾數月子子丹膺拔萃科

孟可訓字欽斯太學生事親孝先世薄有田產悉以與諸弟父母奉養喪葬皆身任之

王文獻爲伯父嗣家甚貧有母八旬餘奉養無缺弟乞食外出不返文獻年已五旬尋諸關外得之攜以歸

無棣縣志

卷十三

人物 孝義

十八

山東商務印刷所印

常晝一字義軒幼失怙恃撫育於祖母長奉事惟謹捻匪之變奉祖母避叢林中以身翳之泣請命賊以爲孝戒勿傷村經變亂修圍牆先售畜羊百頭資築理貧人子陷賊中其母憂泣成疾爲卹其家遣人覓之數月適有送其子自東光來者代酌之而去光緒初歲饑出粟量斗卹濟貧餓鄰人他徙爲理其產儲以待旣歸還之無毫髮私爲人坦易臨事則持正不阿鄉里鬪訴以一言立決治家嚴而有方門內不聞誼笑子 秀東庠生

王毓琪字樹堂父惟詵爲邑庠生嗜讀書不治家人生產毓琪以貧廢學務農業薄田數畝饗殮或不給析薪易米致孝敬饌食供奉必精潔叔母李氏孀節暮歲無依養贍終其身

馮葆田字稼軒嗣父歿於關外時年十九往返數千里輿輓歸

李景妍字明軒弟景潤生時已分爨景妍見其貧撫養之不以累

諸弟及成立分以己產暮年尤勤卹族鄰邑侯以齒德兼隆旌其門

闕尊三少孤貧傭工養母兄亡遺幼姪撫愛如己出晚年家少裕有諷以析居者尊三曰胡以對兄嫂

張玉秀父卒時年十七哀痛迫切至廢寢食一日大風雪夜半身無寸縷逸去家人徧覓之至其父瘞所見墳土旁擁高尺許果在焉手爪皆裂已僵矣

劉曰貞字起元庠生父早亡孝事母與兄曰亨共財友于無間兄曰幹出嗣其家漸落勢將不給曰貞謀諸兄仍同居田產均之孫安字磐石爲人不負然諾喜利濟值歲饑出粟三十石賙族黨有償之者皆辭不受

劉文顯監生家小康歲出餘粟贍貧乏有族人婦攜兒改醮夫虐無棟縣志 卷十三 人物 孝義 十九 山東商務印刷所印 其子歸而哭諸途文顯見之留養其子長爲娶婦給田宅戚黨王姓以貧來歸周卹之歲饑多流丐食以粥親視缶必使盈其樂善如此

劉菽園大學生齒德爲鄉里所尊里有善舉無弗與市有鬪者衆莫解睹菽園至皆愧散人以王彥方比之

李步雲字景峯太學生歲饑出粟五十石施賑其他義舉尤多時有李善人之目

吳德曾鄉飲耆賓篤孝義睦宗族施濟無吝惜慕張公藝之爲人以能忍持家事五世同居門內翁如年八十三無疾卒

李有才太學生樂善好施有求者無不應光緒初年歲荒民飢出鉅貲賑救鄉鄰公送善行不怠區額年至八十有七

李有繼字星垣同治元年城外修築圍牆經營不辭勞瘁直其地

皆捐輸不取值並助公費多緡以資修理光緒初年歲饑捐數千貫濟鄉里皆稱德不衰

胡清泰字安侯咸豐己未武舉上公車不第遂絕意仕進家本豐厚食指衆多綱紀內外條理井然與人接坦白無委曲無少長諄諄語以敦本之道應世之方篤厚古處有先民任卹遺風一時稱長德焉

陶鳳儀業農事親稱孝弟鳳仁不務生產其婦死遺一子鳳儀收養之視如己子

陶淑度字憶黃庠生有雋才風姿灑脫其幼女挑菜河干拾得白金四十兩係賈人文某遺失者也同事者疑其乾沒淑度聞而還之衆始釋然文甚感謝曰汝自有之於我何與

孫聖和農人也有誠實之目一日拾得銀一封藏以待有張某者無棣縣志

卷十三

人物 孝義

二十一

山東商務印刷所印

倉皇來覓詢確還之其人酬謝堅辭不受  
吳式儀字棣臣舉鄉飲耆賓躬行節儉和厚寬易鄉人爭訟爲之平反皆釋然以去尤喜急人之急有負債鬻子者捐百金贖還之無吝惜亦無德色急公好義有先民遺風

王延桂字丹廷廩生爲學掇拾漢唐經解辨析古今文疑義奇字積久累帙以傳授生徒多獲雋以去課讀之暇趨子舍承色笑博膝下歡與人接嘖笑之微亦出於天性不予人欺亦不知人有欺己者

徐夢齡太學生勇敢有爲同治中捻匪亂倡率鄉人築圍牆嚴守禦避難者數千人賴以無患修龍堂橋便行旅捐備荒穀數十石人食其惠

李稱先字述亭諸生性孝悌母嬰異疾突起如癭瘤串移上下痛

不可忍思所以紓緩之者不可得因乘車就醫時震動疾乃不作遂日駕蹇衛奉母輿上環城區週遊不休提攜食飲具隨於後奔馳幾殆道旁觀者皆感觸泣下如是歷三寒暑母卒以疾終號哭骨立終身不乘車兄嗣伯父後同居共財嘗與朋儕夜坐更樓上聞有警歎聲聳然起立衆問故曰適過者吾兄也家素貧而持廉節一介取與必嚴必慎卒無以殮張守箴約諸故舊釀若干金爲營喪葬焉

王雲峯生有異稟幼讀書及長棄學精練武技英勇過人同治七年捻匪亂集衆捍禦賊益集團四合雲峯度不能勝執鎗率鄉人突圍出決盪縱橫匪衆辟易得脫於難晚歲恂恂居鄉集醫方廣行惠術遇有故爲之排解多釋怨以去年至八旬卒子汝南庠生孟慶功字勳臣明忠勇公善嫡裔也爲人孝友捻匪之亂父被執無棣縣志

卷十三

人物 孝義

二十一

山東商務印書館所印

加以刃慶功急遮護之刃中背負創濡血匍匐哀乞賊憐之釋以去母晚年病痿痺奉侍牀第間不以他人代與弟慶泰墳篋翁如也臨終誨其家人曰能忍辱學吃虧無患矣卒年七十六

王爾德字潤齋太學生舉鄉飲耆賓光緒間黃水頻年爲災人乏食施舍家貲殆盡年逾八旬有五子鄉人額其門曰德備福全

李薌林字清圃庠生讀書明敏文辭清利篤友于讓所應分產於昆弟鄉人稱賢又嘗刊刻孝經湯公傳歌並各種善書以勸世

韓立文農人也以孝著母老痿痺飢寒不自知每食必親授以餐節其適可而止數年如一日

年終

李毓崙布衣父讌林歿於遼東聞耗間關數千里屢瀕於危負骸

骨歸人皆稱孝

孟繁第字廣居兆植子精岐黃之術錮疾沈疴多應手奏效爲人坦直有至性而勵廉隅遇貧病者徒步往醫之餽謝弗受強之則怒形於色其性質然也批解醫書成帙藏於家無子以姪祥蓉嗣入邑庠

孟繁嶠字廣漢兆榮子天性孝悌幼時母病疫俯牀嗚啼曰母死吾不生父慰之終不釋母病愈然後嬉戲如故及長事親非有故不離膝下怡色柔聲惟恐幾微不當親意兄弟雍睦共被連牀一日相舍不樂也兄繁譽卒遺子甫四歲撫愛逾於所出析箸時田宅什物皆厚予之居恒以敬人讓入爲言故無與人競爭事年七十有四卒子祥蕭廩生

苑不顯字文周從九品銜秉性正直以濟物利人爲分內事嘗曰

無棣縣志

卷十三

人物 孝義

一二十一

山東商務印刷所印

世間貧富不齊人情則一我有事望假手於人人有事得假手於我其爲賜大矣豈待富厚而後濟人乎故爲人謀則忠敦善行不怠年八十一卒

張雲岫字心齋幼失恃事父及繼母稱孝嗣叔父後朔望祀事致豐潔割產奉堂上甘旨不少懈性篤誠好義精岐黃術求診治者無不應嘗曰藥非能益人但用以攻害人者論者謂深得醫理年逾七旬卒

王其慤布衣家貧不能終學遊歷下爲惜字社收檢字紙之役一日拾得赤側數事待有來覓者詢實配予之有族叔祖客歿於省邸獨力送還其柩後仍往來濟南道上忽易道裝終歲衣敝衲人不能測其淺深

楊師銘字新源太學生家素裕精內外醫科活人頗多有無力延

醫者爲之安置居處施診治並藥餌濟以飲食病愈而去以爲常子宜堯繼其業

張沛漢字倬甫萼桐子太學生爲人樸誠重倫理篤恩義家屢空而持狷介絕不肯折節嚮人素嗜飲典衣換酒揮觴自得有二子長祿元理農桑次樹元投効行陣歷軍秩專閩政板輿奉迓稱觴獻祝頤養天和每以勤慎奉公保全勳名申義方訓旋歸里逍遙杖履同鄉鄰故老杯酒談讌謙光和氣不以富厚驕人未幾日軍勝德據青島樹元提兵駐濰縣辦理中立沛漢寢疾戒家人無使知謂疆場事棘勿徒令方寸亂也卒年七十有六大總統遣使致祭備哀榮焉

郭若愚字慕臬廩貢生以孝行稱母病數年湯藥親嘗未或有間作濟寧州訓導陞學正民國改元歸不復出年七十三高誦韓昌無棣縣志卷十三人物孝義

一二十三

山東商務印刷所印

黎送李愿歸盤谷序數過微疾而卒

韓中焱字文亭立乾子行端學殖早失恃飲痛終身事繼母以孝著弱冠府試冠軍太守張鼎輔器重之光緒己卯領鄉薦司訓嶧縣丁內外艱服闋補曹縣教諭兩出司鐸教先德行次文藝士林矜式民國紀元掛冠歸不復仕卒年八十有二

李文綬字秉義道昌裔孫太學生性孝友少失怙恃逮事曾祖及祖父母嗣祖母繼母六七大故皆一身任之哀禮備至族弟文紱自授書及遊庠食餼誨愛無間歿復恤其妻子嗜讀書好吟咏不問家人生產熱心公益繕治城郭修文廟經理書院及興建學堂皆實力經營暮年倡議修輯邑乘未及就事而卒年七十四

郭樹德字召棠增生事繼母以孝稱女弟幼弱撫循之及笄擇配於詩禮之家資送豐備與人交恂恂篤實既諾不宿推解所有濟

戚族鄉里困乏者尤熱心公義重修張店橋出巨金爲衆倡鳩工庀材竭力經營不少怠未數月巨工告竣行旅稱便

王雲閣家貧不廢學年十六父卒廬墓三年外出不知所終

黃寶田字玉璞性和厚而沈毅父母俱嬰殘疾饗殮饌具寒煖節適必得其宜異母兄弟同居共財和好無間值土匪掠村中率鄉人竭力捍禦斃賊數人負重傷卒

楊玉德字俊軒爲人輕財重義嘗買地一段作通衢計長一百九十步費錢三百緡割腴田十五畝爲鄉鄰貧弱者灌園謀生計不取租入有求者無不應爲人排解紛難須財賄者給予之使解去戒子孫勿討債其長厚如此

按孝義之行出於天性聞宋雲樹者有異疾股羸細兩足具而小反背拳曲不能行立動則以兩手拄地縱身嚮前如螻曲有老母不能操作行乞以養其母所得異食必別儲以進乞得錢則買取餅餌肉食歸奉母前笑容可掬母爲之解頤或憐其母餽之食必

### 無棣縣志

#### 卷十三

人物 孝義

#### 二十四

山東商務印刷所印

以其手口所能効役者酬主人禁之不可得人嘖嘖稱孝子秉彝好德有生同具而顯愚朴誠有文學之士所不能及者觀於此孝弟之心可以油然而興矣

齊邦彥字殿英例貢生幼失恃哀毀如成人事兩繼母誠孝如一親友知交隨時賙卹傾囊倒篋無吝惜康熙間東省饑民流入直境彊仆載路邦彥倡義立粥場於屯南全活甚衆有司旌其門父歿後檢篋笥乞券纍纍悉焚之曰吾以成先志也卒鄉諡純誠

靜海縣

改籍

張學武學憲爲仁之裔操農業咸豐間值旱災人乏食學武捐米穀八十石復向海船富戶勸募巨款拯卹難民光緒十六年霖雨河決民舍蕩沒急出小船五艘親自督率馳駛救濟得全活者二十餘人又捐稻米數石銀百兩會同邑紳募款賑卹口碑流傳不衰卒年八十六民國十年大總統獎以友愛性成匾額

以下改籍寧河縣



張式春字東甲學武子能繼父志鄉鄰戚族困苦孤弱者分別施予米穀銀兩及爲之舉婚嫁無德色民國十年大總統獎以任卹可風匾額

隱逸

明

王希聰字慧生諸生喜讀書年七十餘猶不釋卷又嗜酒嘗自詠詩云自愧一生好貪杯終日劉伶畢卓隨只知三萬六千是不管四十九年非

李之碩字鴻乙諸生於詩書無所不讀尤好箋注之學三桓七穆任舉一事如指諸掌有就正者卽指架上諸書曰某帙第幾册取以來信手發之卽得其處學者皆尊師之明季嘗遊某幕府掌書記疏稿皆出其手鼎革後鍵戶不出狀貌古樸冬月衣木棉裘厚無棣縣志

卷十三

人物 隱逸

二十五

山東商務印刷所印

寸許臃腫離奇殆不可狎近云

高嗣齊字太初知微子崇禎時食餼有學行不屑屑經生業口無擇言遇事能敦大體同輩與晤對終日雖至親密友不敢道鄙褻語鼎革後閉戶不出畢志典墳以終其身

高嗣景字學晦諸生父知彰起家甲第景爲貴公子而耽高隱遇縣令某性嚴急景以璧實外戶取汲皆於牆上後屏居村舍詩酒自適足跡不履城市者數十年所讀書外郭作狂草無俗韻

清

楊浣字子濯明太宰巍近屬也厭城市喧囂居桃花嶺之北室廬僅蔽風雨旁構小齋二楹匾曰石蘭居引一二知己浮白談玄弄琴操數曲擊節高歌聲若出金石好花木而癡籬落下無數弓地蒔花草木皆滿居貧甚或乘其急以某花易米若干不得已許之

且持畚且具酒往既盡歡則詣花所方舉鋏欲下浣不覺屈膝客乃笑而釋之

楊法字子言廩貢生於書無不讀尤精篆刻古樸非近人可及性嗜菊菊之種植色香名稱罔不鑒別細微品題優劣晚歲卜居東郭之徧榜其門曰菊莊東籬花開陶然一醉自謂羲皇以上不殊栗里風流著有詩經四書本說菊莊詩稿

張廷翰字文林諸生年二十病耳聰如古人聞牀下蟻行若牛鬪者好讀書病後不敢多讀稍涉內典晚年禪理益精爲學者講解四子書別有參會非俗儒所知

楊鄂林字棣園工書畫山水得巨然沈周之妙嘗遊燕趙間負重名因性情古傲流傳者頗少兼精劍術號青萍道人同時有騮山後劉宏器者亦善繪事好琴嘗攜以訪友灑落有古風皆享大年

無棣縣志

卷十三

人物 隱逸

二十六

山東商務印刷所印

劉祥雲字瑞堂庠生嗜讀書衣冠敦古處教子弟有規矩經史傳注外雜志虞初等書悉令焚燬之構小齋二楹遍殖花木晨夕靜坐消遣世慮悠然自適有告以時事理亂世途險易者默而不答再言之則舒而誦聲作矣年八十九無疾卒

張守叙字秩山庠生喜繪事遨遊諸公卿一時名噪江南北及大梁花卉蟲魚識者多以司馬鍾目之晚歲伏處里閭來學者獲其指授多名於時門庭洒掃無纖塵老屋數椽左圖右史院中廣植花木偶聞嘉種不惜遠道購致之風趣古茂似魏晉時人年九十二微疾而卒

王應箕字維南應童子試輒列前茅後不復試遊山海關外愛廣寧佳山水卜築焉卽山中墾田躬親拮据食其力居二十年歸終歲手執一編家人生產不問也偶行阡陌間有竊其禾稼者第歎

曰此事不好  
遂精一號天文邑諸生貌醇古耽河洛理數之學爲人卜葬地決  
休咎多奇中

耆壽

明

高俊庠生舉鄉飲大賓年九旬

全續喜爲善重修大覺寺殿址年八旬

張金字國玉以農業興家置田百頃磊落慷慨有義烈風年九十

四

王守分字西安精歷算及形家言充陰陽學訓術萬歷庚申奉文

十一月十五日夜月食至期不至邑令怒招之責曰爾既專司陰

陽如何失誤救護對曰今夜不食至十六日方食耳後果至十六

無棣縣志

卷十三

人物

隱逸

耆壽

二十七

山東商務印刷所印

日己丑夜食前後刻分一如所言令大奇之進士高知彰贈詩曰  
士庶喜吾談造化鬼神畏我破天機年至八十終子希哲嗣其職  
吳世傑舉鄉飲大賓曾遇梁上盜而識其人默遣之去終不語人  
以盜者名其長厚如此年百歲

清

張佩良字友房庠生舉止岸偉遇事持大體有擔當年八十三歲

王錫綸字澤生性恬靜年九十餘或問以養生之術錫綸曰惟節

飲食耳藥餌所以却病非所以引年也

吳永孕字繩甫諸生少有異姿困於場屋有人倫鑑謂其子自肅

曰吾艱於遇大吾門以慰爾祖者將在子乎王少宰清方少永孕

見其文器之命子與之遊曰王君國士也宜師事之康熙甲辰自

肅成進士王少宰以學士爲主司世謂永孕知人自肅督學雲南

告歸終養永孕年八十四尙康健無恙又二年乃考終以曾孫紹詩贈榮祿大夫

王滋曰克菴自滇旋里爲太公稱九十觴遠邇畢集羣情感慕曾以兩言贈之曰一鄉稱孝友六詔有文章其實錄云

張克貞字起元庠生年八十二歲

張元倫字中理武生年八十五歲

張暉字宜中庠生年八十六歲

張嵩字雪嶸庠生年八十二歲

王用之字本恭清六世孫賜壽官年八十七歲子惟康字履常八十六歲姪惟慶字吉人鄉飲耆賓八十一歲姪毓玟字宗士鄉飲耆賓八十三歲

王士賢字少台有謀略膂力過人喜騎射尤精於彈天津監司閱兵有鳥鳴於纛上將卒射之不中士賢適過一彈落之走馬接以

無棣縣志

卷十三

人物 耆壽

二十八

山東商務印刷所印

手監司驚問立賜之金生平以未得樹勳爲憾廣交遊聞人多相往來年八旬賜壽官

張其仁年九十餘歲

吳紹善年九十餘歲

張是增生年八十七歲舉鄉飲介賓

張暉字宜照弱冠遊庠食餼文譽噪起以明經任章邱訓導課士有法卒年八十有二

王一夔字諧倫太學生清之裔醇謹樸誠厚重緘默晚歲家貧八旬餘猶能自力耕耘卒年九十四歲弟五魁字星文年九十歲

張可任年八十九歲

牛維斗謹厚樸古年一百二歲

楊榜字式堂康熙癸酉武舉卒年九十四歲

楊嘉澆老成渾樸年九十歲舉鄉飲大賓

范希康賦性醇謹與世無爭年九十九歲

楊旃字芳遠庠生敦厚古處視人休戚不啻在己親友有憂喜事

慶弔必先至年九十五歲

張恒芳字友蘭年九十歲

徐光佐年九十餘歲

張詩聞字典之庠生年八十一歲

崔近德年九十餘歲

楊培禧字履吉少患痞疾年二十醫藥罔效夜夢人捧太極圖曰無極照你心百年除病根醒而異之因焚香默祝夜又夢神自稱王叔和授以丸吞之曰履道坦坦幽人貞吉彼時實未嘗讀易也自是病愈年九十五歲以子綱贈文林郎

無棣縣志

卷十三

人物 耆壽

二十九

山東商務印刷所印

孫可成字道久賞壽官鄉鄰公送南山松弧匾額年八十二歲

張有聞字建之庠生年九十歲

張維清字匯菴工臨池之學融會諸名家法程而不襲其迹興之所至圓折方流揮灑如志得者什襲藏之年八十三歲卒

郭鏞字振聲庠生篤學不輟享高年永利場大使給齒德兼優匾額

張映傳字雨亭廩貢生工繪事與張雪鴻齊名然不輕爲人作故存者絕少卒年八十

張階字路升庠生齒德兼優待人長厚戚屬楊氏兄弟少孤而貧撫教成立年九十一歲耳目聰明步履強健舉鄉飲耆賓值誕辰親朋稱觴翼日晨起衣冠無疾而逝

信多仁字長元年九旬親見五世子自重孫安曾孫永基玄孫監

生同堂邑令董畿賜五世同堂匾額

邱可峯字雲麓增生精堪輿學年八十三歲子廷珣字藍璞監生年九十歲孫彥文字聖若監生年八十五歲

張兆源太學生夫婦並壽學使鄭敦謹獎以雙壽增榮匾額卒年八十一歲

韓天申性耿介適遼東為人耘青關東為人佃田曰耘青分粟持籌甚平人

以餘羨讓固辭弗受曰吾留餘法於子孫使法吾治田勤其力培其本均其膏腴自種多福溢取何為於是人以韓有道目之暮年益強為善淡然寡欲登上壽

張全泰恩賜壽官卒年八十八歲

張於蘭字青畹諸生教友四方多所成就慈祥悱惻人益敬畏之卒年九十歲

無棣縣志

卷十三

人物 耆壽

三十

山東商務印刷所印

張於藜字向閣庠生年八十三歲

張曾祐字蔭斯幼凝重初就傅終日端坐目不旁瞬逾冠為諸生與人處坦白無城府善善惡惡出於至誠嘗晚歸遇荷鋤者誤觸額血涔涔下荷鋤者亟謝過曾祐曰此我匆遽所致何責於汝其長厚如此年八十一歲

孟士通亞聖裔為人篤誠有族人竊冒其名充當地保者虧糧銀無數而逃貽累士通至罄產不能償會大赦普免山東租糧得無恙年至八十八歲子兆植兆榮兄弟共財友愛之性老而彌篤兆植年九十三而卒兆榮年八十八而卒

信讓字遜齋公好惡樂施予年至八十六歲親見五世子永鎮孫監生印堂曾孫監生衍俊玄孫庠生西庚公送五世同堂匾額  
王儲眷年八十四歲

張兆溥和厚篤摯承辦鹽課事人稱便卒年八十二歲

趙希文字亞韓歲貢生崇文學重德行教子弟有法度以高年終

王儲佑年八十二歲

徐永壽卒年八十歲

劉從聖字學孔習金匱術鍼法絕妙醫治者應手奏效邑人公送濟世引年區額年八十餘無病而卒

傅修德字宗聖太學生年百歲

張廷猷字宏勳鄉飲耆賓年八十八歲

劉東甲字震輔鄉飲耆賓暮年齒重生卒年九十三歲

王徽典字慎五鄉飲耆賓年至九十六歲子監生汝芬孫鴻翹曾孫景彭玄孫慕參公送蔭覃五葉區額

張廷棣年八十五歲子守正八十六歲孫福裕九十四歲福田九

無棣縣志

卷十三

人物 耆壽

三十一

山東商務印刷所印

十二歲三世耄耄稱人瑞

張琬年九十歲子嘉智九十五歲嘉美八十四歲皆以耆德稱

楊寶田字稼山少孤能事母又善醫理卒年八十二歲

王惟誥字封田太學生清七世孫卒年八十三歲

馬紹先卒年九十七歲

張洪謀字聰齋庠生棄儒操賈術稱長厚人不忍欺卒年八十八

范廉海年九十餘歲

王偉字傑生習金匱術爲人醫不受報自設藥室藥售盡不討債復賣田以益之年登耄耄賞壽官

張咸甯庠生年八十五歲

傅宗耀年一百五歲

傅延齡年一百一歲

張燮和字公調庠生學務根柢充養有方粹和之氣達於面目卒年八十一歲

姜國垣字芋亭太學生鄉飲介賓性純正專精醫學痘疹科尤最精公贈保赤遂生匾額姪慶陽字健圃亦善醫並以高年終

韓呈祥武庠生性豁達有幹略常濟急扶危庇護宗族捐募倡修電神廟香火稱盛年至九十有二

韓繼思恂謹老成登大年白髮長鬚儀容修偉居哇坪別業捻匪過見之不忍加侮

王延熙字克敬習醫術有求醫者十里內不乘車馬不啖酒飯年八十九歲猶強健能灌園數畝賞壽官

張萼峯武生年八十三歲夫婦並壽子吏員敬居孫附生平遠曾孫元祥玄孫其昌五世同堂光緒元年奉旨旌表

無棣縣志

卷十三

人物 耆壽

三十一

山東商務印刷所印

劉倫貴年八十二歲

馬作梅字和卿增廣生邑侯獎以年高德劭匾額卒年八十九歲張連茹字彙升歲貢生年九十餘耳目聰明行不扶杖稱齒德焉

張玉成年八十五歲

韓玉增年九十五歲賞壽官

劉鳳庭字儀堂家貧舌耕於津門自奉儉約習形家言爲人擇地不索謝舉鄉飲耆賓卒年八旬

劉霄漢字銀浦歲貢生兄弟共財雍睦無間九十一歲卒

劉管清字溪亭增廣生長厚篤文學舉鄉飲介賓年八十三歲

張貽珍字芸谷歲貢生喜文辭美書翰卒年八十歲

王毓璽字印亭清八世孫舉鄉飲介賓年八十六歲

杜鳳山字鳴岐鄉飲耆賓年九十三歲



杜玉柱字國棟鄉飲耆賓年九十二歲

張桐雲字琴圃庠生志學老而彌篤年逾八旬

邱長清字鑑泉太學生性和厚能忍讓遇有橫逆概不與校年九十三歲子振標字錦芳太學生年八十六歲

劉毓珩字佩和歲貢生教授生徒喜講忠孝節義事和氣藹然與人無忤鄉里薰其德乏爭訟年八十八歲

楊君平字永思年八十七歲

李子馨字香岩庠生溫厚篤實言行不欺稱今之古人以高年卒陳士信年九十八歲無疾卒

張發源字岷山太學生鄉飲介賓年八十四歲

陳殿元字臚先庠生鄉飲介賓年八十三歲

李廷柱字砥源鄉飲耆賓秉性正直急公好義年至九旬

無棣縣志

卷十三

人物 耆壽 後叙

三十三

山東商務印刷所印

劉葵字智亭操賈術慨爽喜施濟卒年九十

陳益修廩生文行並著有聲庠序中以高年卒

范中岳字少巒增廣生言矩行方不逾尺寸年八十四歲

喬悅曾太學生年八十四歲

陳繼昌年八十二歲

吳重義字宜菴庠生渾厚無棱角年逾八旬

李景星字存仁年八十七歲

李奉先年八十三歲

孫丕基字業堂鄉飲耆賓年八十一歲

吳雲岱字魯瞻年八十二歲

王彥鏞卒年八十一

叙曰元和郡縣圖誌太平寰宇記不載人物以列於史籍可考

也後世郡邑志乘例詳之近蔡氏廣輿記人物備載如郡邑志乘之例論者謂名區大都扶輿磅礴河嶽鍾靈奇人傑士多出其間譬如榱枅梓千章之木當求之名山大壑不生於培塿之墟此亦非通論也無棣海隅東陲自唐宋以迄明清代有聞人內之當軸秉鈞以資柱石外之建牙開府以藩封疆珥筆彈事重耳目之官輜軒觀風膺皇華之使偉烈豐功足以銘旂常光簡冊而智勇之將託爲腹心亦雲臺麟閣之選也下之宰州邑任民社茂治績而播循聲者更不乏其人譬之構大厦者既具梁棟之材而椳闔樞櫨亦兼資並畜故曰材無大小惟適所用義在於斯至守義不回殉國捐軀尤炳炳大節扶持綱常於不敝者矣若夫宿儒碩學明道術以啟愚蒙懿德芳型礪薄俗而歸敦厚傳列高士溯箕潁之遺風禮重引年徵國家之人瑞

此皆本末足觀各有其不可沒者在也合而輯之登諸簡端人生品節身後論定按照史例故夫存者於茲弗錄

